

凡參國忌五位已上待會事訖乃歸却若不然者同不參例其六位已下闕職掌者奪季祿布二端○中
 凡可參藥師寺最勝會興福寺國忌并維摩會王氏藤原氏若不參者五位已上不預新嘗會節六位已下官奪季祿○中

凡應參判奉試文之庭諸儒无故不參五位已上不預正月七日若新嘗會節六位以下奪季祿○中
 凡諸司并畿內司不進考文者五位以上不預節會六位以下拘留季祿

凡考問之日有不參司其五位已上不預節會六位已下奪季祿○下

〔延喜式六齋院〕凡院裏官舍木工寮修理之日院司臨監若不滿十年令致破損者司官五位已上奪位祿六位已下奪季祿

雜載

〔本朝文粹二意見封事〕意見十二箇條

善相公清行

一請平均充給百官季祿事

右謹案式條二月廿二日八月廿二日於大藏省可給百官春夏秋冬季祿而比年依官庫之乏物不得遍賜由是公卿及出納諸司每年充給自餘庶官則五六年內難給一季料伏案事意上下分階故祿之多少各異閑忙殊務故物之精麤不同至于頒賜宜無差別豈可俱勤王事別置偏照之官同列周行或比躰國之俗乎伏望若可給季祿者先計物多少公卿百官一日遍給一如式文若官庫無物者同亦不賜無有偏頗如此則鳴鳩在桑均哺養於七子單醪投流期酣醉於三軍○中

延喜十四年四月廿八日

從四位上行式部大輔臣三善朝臣清行上封事

〔類聚三代格五〕太政官符

應停攝津職爲國司事

右被右大臣宣備奉勅難波大宮既停宜改職名爲國其二季祿及月料並從停止

延曆十二年三月九日